



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FA-V12, FE-223	23/1145

HANDSAMING AV SØKNAD OM BYGDEUTVIKLINGSMIDLAR TIL GAPAHUK I BERGSØYANE

Vedlagte saksdokument:

Budsjett gapahuk (version 1).xlsb

Søknad Bygdeutvikling

Kommunedirektøren sitt framlegg til vedtak:

Bygdeutviklingsutvalet løyver inntil kr. 35 000,- i bygdeutviklingsmidlar til Bergsdalen Bygdelag for bygging av gapahuk i Bergsøyane i Bergsdalen til friluftslivsføremål.

Tilskotet utgjer 25 % av budsjettert kostnad på kr. 138 700,-, inkludert verdien av dugnadsarbeid.

Tilskotet vert betalt ut som eit «fast» eingongsbeløp etter dokumenterte kostnader.

Det er eit vilkår at samtykke frå grunneigar er innhenta, og at eventuelle, naudsynte løyve etter aktuelle lovverk, er gjevne før tiltaket vert starta opp.

Tilskotet vert betalt ut etter innsending av sluttrapport, med betalingsoppmoding og kostnadsdokumentasjon (faktura, bilete m.m.). Det skal førast timelister per dag for eige arbeid.

Løyvinga gjeld i to år, fram til og med 01.10.2025. Det kan søkjast om utsett arbeidsfrist.

Saksopplysningar:

Samandrag/konklusjon (kort om saka)

Bygdeutviklingsutvalet har kr. 265 000,- kr. til fordeling ved søknadsrunden i september 2023. Det er søkt om kr. 760 000,- ved gjeldande søknadsomgang, fordelt på 11 søknadar.

I søknad av 28.08.23 søkjer Bergsdalen Bygdelag om kr. 50 000,- i tilskot til oppføring av gapahuk i Bergsdalen for friluftslivsføremål. Total kostnad er budsjettert til kr. 138 700,-, inkludert eigeninnsats (dugnadsarbeid). Faktiske kostnad er sett til kr. 108 700,-.

Kommunedirektøren vurderer at tiltaket si tilrettelegging for friluftsliv, er i tråd bygdeutviklingsmidlane sitt føremål.

Med bakgrunn i innkome søknadar og tilgjengelege midlar, er innstillinga å løyve inntil kr. 35 000,- til

tiltaket. Tilskotet vil i dette høvet utgjere høvesvis 25 % og 32 % av samla og faktisk kostnad.

Bakgrunn for saka

Bygdeutviklingsutvalet har lyst ut ny søknadsrunde for Bygdeutviklingsmidlane, med kr. 265 000,- til rådvelde. Det kom inn 11 søknadar, med ein samla søknadssum på om lag kr. 760 000,-.

Målet med bygdeutviklingsmidlane er å leggje til rette for opplevingar og aktivitetar som er opne og tilgjengeleg for alle, og som skapar trivnad i bygdene. I dette høvet kan lag, organisasjonar, verksemdar og einskildpersonar søkje om tilskot til prosjekt eller gjeremål med ålmennyttig verdi.

I sin søknad av 28.08.23, søker Bergsdalen Bygdelaag om kr. 50 000,- i bygdeutviklingsmidlar til å byggje gapahuk i Bergsøyane i Bergsdalen. Føremålet med tiltaket er å leggje til rette for eit lågterskeltilbod for friluftsliv, spesielt retta mot born og personar med nedsett funksjonsevne. Gapahuken vil ha lett tilkomst, og skal kunne nyttast heile året.

Gapahuken si planlagde plassering gjer det mogleg med ulike aktivitetar like ved, som fiske i Bergsdalselva, samt bruk av akebakke og skiturar i skiløyper, vintertid. Det vil også bli etablert bål plass, saman med utlån av kanoar på sikt. Søkar nemner i dette høvet at gapahuken vil vere med å utvikle Bergsdalen som turmål, og være eit tilskot til turmoglegheitene som er i dalen frå før.

Gapahuken skal setjast opp som byggjesett. Kostnads- og finansieringsplanen med tiltaket inkl. mva, er oppgjeve til følgjande:

Tekst	Kostnad (kr.)	Finansiering (kr.)
Grunnarbeid	25 000,-	
Byggjesett, gapahuk	72 000,-	
Innkjøp av benkar	4 700,-	
Diverse	7 000,-	
Verdien av eigeninnsats	30 000,-	
Tilskot Bygdeutvikling		50 000,-
Tilskot Eldsjelfondet		50 000,-
Eigeninnsats (dugnad)		30 000,-
Eigne midlar		8 700,-
SUM	138 700,-	138 700,-

Søkar opplyser at grunneigar har gjeve løyve til tiltaket.

Det vert vist til søknaden for nærare informasjon om tiltaket.

Formelt grunnlag:

- «Retningslinjer for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden vert vurdert som tilstrekkeleg opplyst for sakshandsaming og vedtak etter gjeldande krav.

I følge bygdeutviklingsmidlane sine retningslinjer, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv. I dette inngår stønad til konkrete prosjekt, tiltak og aktivitetar, som gjeldande søknad høyrer inn under.

Kommunedirektøren vurderer at planane om å setje opp gapahuk for bruk til friluftsliv, er i tråd med bygdeutviklingsmidlane sitt føremål, og i kjernen av kva midlane skal leggje til rette for. Gapahuken gjev i dette høve eit lett tilgjengelege og enkelt, tilrettelagt tilbod for opphald og aktivitetar i naturen. Tilbodet bør ha brei appell, med tilpassa bruk. Kommunedirektøren vil også trekkje fram initiativet for å skape eit lågterskeltilbod for opphald i naturen, med variasjon i tilrettelegginga og opplevingstilbodet i dalføret. Det vil difor vere grunnlag for å tildele midlar til tiltaket.

Ei tildeling av tilskot må sjåast i samanheng med andre, innkomne søknadar og tilgjengelege midlar til disposisjon. Etter ei vurdering går difor Kommunedirektøren inn for å løyve inntil kr. 35 000,- til tiltaket, som er kr. 15 000,- mindre enn kva det vert søkt om. Tildelinga vil utgjere 25 % av budsjettet kostnad, inkludert dugnadarbeid, og 32 % av planlagde innkjøpskostnadar.

Bygdeutviklingsmidlane sine retningslinjer seier at det skal takast omsyn til geografisk fordeling ved bruk av midlane, og at bygder som ikkje har fått midlar tidlegare, skal prioriterast. I dette høvet har dei aller fleste bygdene i kommunen fått tildelingar, som regel fleire gonger, også Bergsdalen. Desse vurderingane er tekne med i handsaminga av søknaden.

Søklar sin søknad om tilskot frå Eldsjelfondet, påverkar ikkje tilskotet frå Bygdeutviklingsutvalet, etter Kommunedirektøren si vurdering.